

GECHI-INENDAAGWAK: GAA-BAGIDANAAMONG GAA-ADAAWAADEG 101



WEGONEN GAA-NAAGWASINONG ISHPIMING GAA-GIZHIDEK?

Amii ini GHGs gaa-naagwasinog ishpiming gaa-ayaag, ozhi'oomaganon ishpiming, giizisong onji-ozhi'oomagan gizhidewin. Mii dash iwe gaa-izhinikaadeg “Gaa-naagwasinog Gaa-izhisek” Bagidinigaadeg iwe gaa-naagwasinog ji-gizhidemagak ishpiming mii ge-izhi-gizhidek aki miziwe gaye ji-aanjiseg gaa-izhiwebak miziwe.

Mii ono GHGs gaa-wiindegin:

- Bezhiig dinookaan Gaa-naagwasinog Gaa-bagidanaamong (CO₂)
- Gaa-naagwasinog ishpiming waasiganing izhi-aabadan
- Anaamakamig gaa-onjiimagak gaa-naagwasinog (CH₄)
- Gaa-naagwasinog dakisijiganing gaa-izhi-aabadak
- Gaa-naagwasinog gaa-aabadak gii-bakodaabideng
- Gaa-naagwasinog gaa-aabadak dakisijiganing

Aanind GHGs nawach da-gizhideshkaagemaganon apiich godak. Ji-gojichigaadegin ini GHGs daa-dagonigaade iwe gaa-naagwasinog CO₂e aaniin epiichi-gizhideshkaamaganogwen (GWP). CO₂e gii-aanjiseg iwe, bakaan dino GHGs daa-achigaadewan ji-bagijiseg iwe GHG gaa-naagwasinog gemaa gaawiin.

WEGONENAN GHG GAA- BAGIJISEGIN, GAA-ANI- AGAASIINADAK GAYE GAA- ODAAPINIGAADeg?

GHG bagijisewan gii-bagidinigaadegin ishpiming GHGs giishpin gii-aabajichigaadeg waasiganibimide gaye diizan waasiganibimide gaye gii-wanaadak gaa-gii-bimaadiziimagak. Nawach bangii GHG daa-bagijise giishpin nawach bangii aabajichigaadegin waasiganibimiden. GHGs daa-onji-odaapinigaadewan ishpiming giishpin eshkwaad igo izhisek gemaa bemaadizid odaapinang gaye ganawendang. Daabishkoo giishpin gitigaanan odaapinamowaad iwe gaa-bagidanaamoying gii-nitaawigigin. Gaye gaa-nagajitoowaad owe dinookaan o-daa-odaapinaanaawaan GHGs gaye ji-aanjitoowaad gaa-izhiyaanigin ji-ganawendamowaad.



Gaa-ani-gizhidek miziwe akiing (GWP):

Iwe Anaamakamig gaa-onjiimagak gaa-naagwasinog ayaamagan GWP 25 dasing na-wach daa-gizhideshkaagemagan apiich wiin iwe Gaa-bagidanaamoying, giishpin 1 gichi-dibaabiishkoojigan iwe Anaamakamig gaa-on-jiimagak gaa-naagwasinog nasaab daa-inishkaagemagan daabish-koo iwe gaa-bagidanaamong gaye 1 gichi-dibaabiishkooji-gan izhi-aanjichigaadeg 25 gichi-dibaabiishkoojigan gaa-bagidanaamoying.






WEGONEN IWE GAA-BAGIDANAAMOYING GE-IZHI-ADAAWAADEGIBAN?


Mii iwe gaa-ijigaadeg ji-adaawengiban gaye ji-adaawaadegiban iwe ganedat (gaye ge-adaawaadegiban) ini GHG gaa-bagijisegin, gaa-ani-agaasiinokin gemaa gaa-odaapinigaadegin. Izhichigewinan gemaa awiyag gaa-adaawewaad ganedat ge-adaawaadegi-baniin gii-adaawaadeg gaa-bagidanaamong ji-bagidinang GHG.

Niizhwayag ayaawan ge-izhi-adaawaadegiban gaa-bagidanaamong – wiin igo ji-doodang bizaanigo gemaa ji-inind ji-doodang. Wegonen ge-odaapinigaadeg da-izhise giishpin wiin igo ganedat wii-adaawed gemaa inind ji-adaawed iwe gaa-bagijiseg.

Awiyag gemaa izhichigewinan gaa-inendamowaad bangii eta ji-bagidinamowaad GHG ishpiming o-daa-aabajitoonaawaan ini **ge-adaawaagewaapan** ji-gashkitoowaad gaa-wii-izhichigewaad. Daabishkoo, aanind izhichigewinan inendamowaad gaawiin ji-bagidinanziwaad gaa-naagwasinog ishpiming bezhigo-biboon izhiseg. Amii ekidowaad gaawiin aapiji o-da-bagidinanziinaawaa iwe gaa-naagwasinog ishpiming meshkwach dash naasaab minik GHG o-da-odaapinaanaawaa. Bezhig miinawaa giishpin awiyag inendamowaad gaawiin ji-bagidinanziwaad gaa-naagwasinog gaawiin babaa-ayaasigwaa ishpiming.

Ini izhichigewinan gaa-ikidowaad **bangii eta** ji-bagidinamowaad gaa-naagwasinog **e-inaakonindwaa ogimaawining onji** gaa-onji-bagidinindwaa **ji-adaawaagewaad eta** da-izhichigewag. Igi gaa-inaakonindwaa gaawiin memwaach ji-biminizha'amowaad inaakonigewin da-bagidinaawag ji-adaawewaad gaye ji-aabajitoowaad ge-aabajitoowaad ji-bagidinamowaad.





WEGONEN IWE GAABAN GANEDAT?

Mii iwe (gaye gaaban ganedat izhinikaade) daa-adaawaade **bezhig gichi-dibaabiishkoojigan GHG ji-bagidinigaadegin gemaa GHGs ji-onji-odaapinigaadegin ishpiming**. Ini gaaban ganedat ge-adaawaadegiban gaa-bagidinang bangii nawach ji-aabajichigaadeg GHGs miinaawag, giishpin izhichigewaad gaa-inindwaa ji-izhichigewaad. Ono dash gaaban ganedat adaawaadewan gaa-izhi-adaawewaad ini dinookaanan gaye bakaan awiyag ji-aabajitoowaad gaa-bagidinindwaa gemaa bangii eta ji-bagidinamowaad iwe ishpiming.

WEGONEN IWE GHG GAABAN GANEDAT IZHICHIGEWIN?

Iwe GHG gaaban ganedat bagidiniwewin (gaye GHG gaaban ganedat izhichigewin izhinikaade) ikidom aaniin ge-ayizhiing ji-aabajichigaadegin ini gaaban ganedat. Ji-aabajichigaadegin ini gaaban ganedatan, awiyag gemaa izhichigewinan da-izhichigewag gaa-inindwaa minik ji-bagidinamowaad iwe gaa-dazhinjigaadeg. Ogo awiyag gemaa izhichigewinan – gaa-dazhiikamowaad ono izhi-chigewinan – o-daa-ozhibii’aanaawaan odizhichigewiniwaa e-wii-izhichigewaad, ji-biminizha’amowaad gaa-inindwaa ji-doodamowaad, gaa-izhi-bagidinindwaa, ji-wiindeg aaniing ge-izhichigewaad. Awe gaa-naagajitood owe da-ikido iwe izhichigewining gaa-anokii-waad e-gii-biminizha’amowaad gaa-gii-inindwaa jibwaa-aabajitoowaad ini ganedads.

Gaawiin wiin ogimaawining onjiisiwag igi gaa-naagajitoowaad ono izhichigewinan aaniish ozhichigaadewan inakonigewinan ge-biminizha’amowaad igi gaa-dazhiikamowaad ini izhichigewinan.

Ogimaawining dash wiin onjiimaganoon ini gaa-dazhiikamowaad gaa-inindwaa aaniin ge-izhichigewaad, ozhichigaadewan inakoni-gewinan aaniin ge-izhi-aabajichigaadegin ini ganedads gaye e-ozhichigaadegin ini ganedad ge-aabajichigaadegin.

Ini gaye ozhichigaadewan ji-aabajitoowaad igi gaawiin ge-bagidini-gesigwaa ishpiming niibiwa dinookaanan izhichigewinan gaye aanii-nigo ji-izhichigewaapan aabajitoowaad ini izhichigewinan, nawach niibiwa ji-biminizha’amowaad inakonigewinan.





WEGONEN IWE GEGOON GAA-ADAAWAADEGIBAN IZHICHIGEWIN?

Ini gaa-dazhinjigaadegin wiinawaa go gaa-dazhiikamowaad ji-bagi-jisegin GHG ishpiming daa-gii-izhise gaawiin memwaach ji-izhiseg iwe izhichigewin. Igi gaa-dazhiikamowaad o-daa-ozhibii'aanaawaan odizhichigewini-waan gaa-naagajitoonid, miinawaa ji-doodamowaad iwe, gaye ji-naagadawaabandamowaad gaye ji-ozhibii'amowaad wayaabandamowaad gaye enendamowaad, gaa-inindwaa ji-doodamowaad. Gaye daa-ozhibii'igaadeniwan gaa-ikidowaad bangii eta e-gii-agidinamowaad imaa ishpiming, awiyan gaa-inwaazonid ji-ozhibii'ang.


Daabishkoo ono dinookaanan gaa-ijigaadegin:

- Nawach babenak ji-naagajichigaadegin mitigwakiin ji-ayaamagak iwe gaa-bagidanaamoying mitigong / azhashkiing.
- Ji-manaa-bagijiseg iwe anaamakamig gaa-onjiimagak gaa-naagwasinog imaa gaa-izhi-ningwa'igaadeg azhashki akiing.
- Ji-naadamawindwaa mitigoog gaye mashkosi ji-aabajitoosigwaa igi gaa-waakaa'igewaad (ji-bagijisesinog gaa-naagwasinog)
- Ji-aabajichigaadeg bakaan gegoon imaa dakisijiganing gaawiin dash ji-onji-gizhidesinog aki miziwe.
- Ji-izhichigeng ji-wanaadak webinigan apiichwiin webiniganikaang ji-izhi-webinigaadeg
- Ji-nitaawigi'indwaa mitigoog
- Ji-odaapinigaadeg gaa-naagwasinog bizhikiwi-moowing gaa-ayaag.
- Nawach niibiwa ji-ayaamagak gaa-naagwasinog gaa-bagidanaamoying imaa gitige-azhashkiing.

AWENEN GE-IZHICHIGEPAN ONO DINOOKAAN IZHICHIGEWIN?

Awe ge-izhichigepan owe (gaa-dazhiikang izhichigewin) omaajitoon owe dinookaan ji-bagidinind ji-bagidiniged ishpiming bizaanigo. Awe gaa-naagajitood dash ikido ge-inaakonigeng awenen ge-gash-kitoopan ji-aabajitood iwee izhichigewin. Aanind izhichigewinan inaawag ji-izhidaad imaa awe gaa-anokiitang izhichigewining gemaa ji-dananokiid besho imaa gaa-dazhiikang odizhichigewin.

Ganedid gaa-bagidanaamong bagidinigaade ji-bagijiseg



WEGONENAN INI IZHICHIGEWIN INAAKONIGEWINAN?


Izhichigewinan inaaikonigewininan ikidoomaganoon aaniin ge-izhichiged awe gaa-anokiitang iwe. Wiindamaagem awenenag ge-daziikamowaad iwe gaye aan mayaa ge-izhichigeng ji-debinigaadeg aan minik ge-adaawaadegibaniin apii dazhiikigaadeg iwe izhichigewin. D-wiindamaagem gaye aaniin ge-ayizhiing (aaniin minik ge-bagidinigaadeg gaa-naagwasinog ishpiming, daabishkoo sa go gaa-izhichigeng bizhishig). Da-wiindamaagewag gaye aaniin minik gikendaasowin ge-maawa-jichigaadeg ge-naagajichigaadeg, gaye naagadawaabanjigaadeg iwe izhichigewin aaniin ge-izhi-maanzhichigemagakiban. Ono gaa-dazhinjigaadegin izhichigaadeg ji-gikenjigaadeg bangii eta gemaa gii-odaapinigaadeg bagijisewin imaa izhichigewining deminik gaawiin gaye ozaam niibiwa ji-inenjigaadeg ji-ayaamagak.

AAN EPIITENDAAGWAK IWE GAABAN GANEDAT?

Bakaan da-apiitendaagwan iwe izhichigewin anikiwang ono dash ge-onji-izhiseg:

Eyaamagak gaye endawenjigaadeg:

Minik eyaamagak gaye minik endawenjigaadegin ini gaa-dazhinji-gaadegin da-apiitagindewan. Giishpin niibiwa ayaamagakin ini gaaban ganedat gaawiin dash aapiji andawendaagwakin, da-niisagindewan. Giishpin dash bangii eta gaaban ganedat ayaagin, niibiwa dash awiyag andawendamowaad, da-ishpagindewan. Minik eyaamagakin ganedat izhichigewinan gaa-izhi-ozhi'oomagakin ganedat da-onji-ayaawan ini GHG gaaban ganedat gaye minik eyaamagakin gaaban ganedat inaaikonigewin, zhooniyaa ge-asind imaa gaaban ganedat, gaye aan minik ge-andawenjigadegin gaaban ganedat anikiwang. Maagizhaa gaye ganedat izhichigewinan ginwesh da-izhisewan ji-maajii-ozhi-oomagak gaaban ganedatan – niibiwa daso-gikinoonowin. Niibiwa gegoon gaa-izhiseg da-onji-andawenjigaade iwe ikidong ji-adaawaadeg daabishkoo bangii eta bagijiseg gaa-naagwasinog ishp-ming gaye gaa-inagindegin godak gaa-bagijisegin. Aaniin minik igi gaa-ikidowaad bangii eta ji-bagidinamowaad iwe gaa-naagwasinog ishpiming gaye minik enendamowaad da-ikidoomagan aaniin minik ge-anawenjigaadeg iwe bizaanigo ji-adaawaageng gaa-ijigaadeg. Mii wenji-zanagak ji-ikidong aaniin minik ge-andawenjigaadeg iwe gaaban ganedat ayaamagak, gaye endawendaagwak gaye ge-inagindeg.



Inaaikonigeng gemaa bizaanigo ji-adaawaageng:

Ge-aabadakin ini gaaban ganedat imaa gaa-izhi-inaakonigeng adaawewining nawach niibiwa inagindewan aaniish daa-aabajichigaadewan gii-inaakonigeng bangii ji-bagijiseg ishpiming gaa-naagwasinog. Ini gaaban ganedat ge-aabadakin bizaanigo ji-adaawaadeg nawach niisagindewan.

Dinookaan izhichigewin ge-onji-ozhi'oomagak gaaban ganedat:

Aanind gaa-adaawewad gaaban ganedatan, daabishkoo bizaanigo ji-adaawewaad, izhichigewinan onji-adaawewag ge-onji-minosewaad (daabishkoo biodiversity gemaa ji-minochigaadeg dazhiikewin) ngoji gaye izhi-ayaamagan gemaa godak gegoon. Ogo nawach niibiwa da-wii-diba'igewag ini gaaban ganedatan aaninda izhichigewining.

Enenjigaadegin epiitendaagwakin gaaban ganedatan:

Epiitendaagwakin gaaban ganedatan imaa bizaanigo gaa-izhi-adaawaa-degin minik epiichi-inenjigaadeg ji-mino-inaakonigeng imaa offset system da-onji-inenjigaade ini izhichigewinan gaye ganedat ge-onji-ozhi'oomagakin e-onizhishingin.

Ge-inaakonigeng ji-odaapinigaadegin gaa-onizhishinzinogin gaaban ganedat:

Ningoding gaawiin onizhishinzinoon gaaban ganedat inenjigaade gii-ishkwaa-ozhichigaadeg. Giishpin gaawiin gwayak gaa-inaajimosing gemaa giishpin nawach wiikaa gaa-bagidinigaadeg ngwana iwe gaa-ganawenjigaadeg gaa-naagwasinog ishpiming, daa-izhise iwe. Gaa-naagajichigewaad ikidowag ji-naabishkigaadegin ini credits gaa-onizhishinzinogin. Mii ge-ikidowaad gaaban ganedatan gaa-ayaawaad awe izhichigewin gaa-ayaad ji-naabishkang iwe gaa-onizhishinzinog. Aanind gaaban ganedat izhichigewin odayaanaawaan ganedat ge-aabajichigaade-gibaniin ji-naabishkaagemagakin naaningoding. Gaaban ganedatan gaa-onjiimagakin gaa-izhi-inind gaa-gii-adaawed ji-naabishkang ini ganedatan gaa-onizhishinzinogin nawach ji-dabasi-adaawaadang ozaam gaa-adaawed ji-wanichiged.



WEGONEN IWE GHG GAABAN GANEDAT BIINDIGEBII'ODIZOWIN?

Gaa-onizhishingin ini gaaban ganedat daa-wiindamaagemaganoon aan ezhisegin gaaban ganedat gaa-biindigebii'odizong izhichigewinan gaye godak. Iwe GHG gaaban ganedat biindigebii'igan daa-wiiji'iwemagan ji-gikenjigaadeg aandi eyaagin izhichigewinan, awenen gaa-biindigebii'ang izhichige-win gaye gaa-gii-miinind gaaban ganedat gemaa giishpin gaa-adaa-waagaadegin ini ganedat gemaa gaa-aabajichigaadegin gaye awenen gaa-aabajitood ini ganedat.

Gakina awiya gikendang owe da-izhisemagan GHG gaaban ganedat ji-gikenjigaadegin aan ezhisegin gaye giishpin ji-debwemagakin. Gaaban ganedatan gaa-wii-adaawewaad oadaa-waabandaanaawaa iwe biindigebii'igan ji-waabandamowaad giishpin ini offset credits gaa-wii-adaawed gaa-izhi-miinind odizhichigewining gaye gaamashi gaa-adaawaadesinogin gemaa bakaan awiya ji-aabajitood.

